



Ukweli Wote Unakubaliana

Bwana ndiye aliyezifanya mbingu....Mpeni Bwana utukufu wa jina lake.
—1 Mambo ya Nyakati 16:26-29.

Wapo watu wanaodhani kuwa wamefanya uvumbuzi mwingi wa ajabu katika sayansi. Huwa wananukuu mawazo ya watu wenye elimu kama vile wanawaona kuwa hawakosei, nao wanafundisha mambo yaliyofasiriwa na sayansi kama kweli zisizoweza kupingwa. Na Neno la Mungu, ambalo limetolewa kama taa kwa miguu ya msafiri wa duniani aliyechoka, linapimwa kwa kiwango hicho na kuonekana kupungua. Utafiti wa kisayansi ambao watu hawa wameuendekeza umethibitika kuwa mtego kwao. Umeweka wingu mawazoni mwao, nao wamevutwa hadi katika nadharia ya kushuku. Wanao utambuzi wa nguvu; na badala ya kumtazama aliye Chimbuko la hekima yote, wanafaulu katika fununu tu ya ujuzi ambao wameupata. Wametukuza hekima yao ya kibinadamu wakipinga hekima Yake Mungu aliye mkuu na mwenye uwezo, na wamediriki kuingia katika ugomvi na Yeye.

Mungu ameruhusu mafuriko ya nuru kumwagika duniani katika mambo ya uvumbuzi katika sayansi na sanaa; lakini wakati watu wanaodai kuwa wanasayansi wanapotoa mihadhara na kuandika mada hizi kutokana na mitazamo ya kibinadamu tu, ni hakika kuwa watishia kwenye mahitimisho yasiyo sahihi. Akili zenye uwezo mkubwa zisipoongozwa na Neno la Mungu katika utafiti wake, huchanganyikiwa katika majaribio yao ya kuchunguza uhusiano wa sayansi na ufunuo. Mwumbaji na kazi Zake huwa ni mkubwa sana kuliko uelewa wao; na kwa sababu hawawezi kueleza haya kwa sheria za asili, historia ya Biblia inaangaliwa kama isiyotegemeka. Wale wanaotilia mashaka uaminifu wa rekodi za Agano la Kale na Jipya wataongozwa kupiga hatua moja zaidi, na kutilia mashaka kuwepo kwa Mungu; na kisha, wakiwa wameachilia nanga yao, wanaachwa wakitangatanga kwenye miamba ya ukafiri. Musa aliandika akiongozwa na Roho Mtakatifu, na dhana sahihi ya jiolojia kamwe haitadai juu ya uvumbuzi ambao hautaweza kupatanishwa na kauli zake. Wazo ambalo kwalo wengi hujikwaa, kwamba Mungu hakuumba maada wakati ambapo alifanya ulimwengu ukawepo, linazuia uwezo wa Mtakatifu wa Israeli.

Wengi, wanapojikuta katika hali ya kutokuweza kumpima Mwumbaji na kazi Zake kwa ujuzi wao pungufu wa sayansi, hutilia shaka kuwepo kwa Mungu na hivyo kulinganisha nguvu isiyo na ukomo na viumbe asili. Watu hawa wamepoteza usahili wa imani, na hivyo wanawekwa mbali na Mungu kwa roho na moyo. Yapasa kuwe na imani iliyotulia katika uungu wa Neno takatifu la Mungu. Haipasi Biblia ipimwe kwa dhana za kibinadamu za sayansi, lakini sayansi yapasa ipimwe kwa kiwango hiki kisichokosea. Wakati Biblia inapotoa kauli za kweli za viumbe asili, sayansi inaweza kulinganishwa na Neno la Mungu lililoandikwa, na uelewa sahihi wa vyote viwili daima utavithibitisha kuwa na upatanifu. Hakuna kinachopinga kingine. Ukweli wote, uwe katika viumbe asili au ufunuo, unakubaliana (The Signs of the Times, Machi 13, 1884).